

- प्रधानमंत्री नरेंद्र मोदी होरें अज्ज STIC Conclave-2025 दा उद्घाटन कीता ते आखेआ जे भारत हुन टेकनालजी दा छड़ा इक उपभोक्ता गै नेई, सगुआं इस क्षेत्र दा इक महत्वपूर्ण अगुवाह बनी गेदा ऐ।
- बिहार च विधानसभा चुनां लेई प्रचार-प्रसार जोरें-शोरें जारी, एन.डी.ए ते महागठबंधन दे बड्डे-बड्डे स्टार प्रचारक मते-मते लोकें गी अपने हक्के च करने लेई रोड शो ते रैलियां करा करदे न। पैहले गेड़ दे चुनां लेई प्रचार अभियान कल खत्म होई जाग।
- राष्ट्रपति द्रौपदी मुर्मू होरें उत्तराखंड विधानसभा दे विशेष इजलास गी संबोधित कीता, राज्य च शिक्षा, सेहत ते मनुक्खी विकास ते क्षेत्र च होआ'रदी तरक्की दी सराहना कीती।
- तेलंगाना च इक ट्रक ते बस दी टक्कर च 19 जनें दी मौत, जयपुर च तेज रफ्तार बेकाबू गड्डी दे लवेटे च औने करी 13 लोकें दी मौत, कई जखमी।
- अमरीकी राष्ट्रपति डोनाल्ड ट्रम्प होरें आखेआ जे पाकिस्तान बड़ा सक्रिय होइयै परमाणु परीक्षण करै करदा ऐ।
- पच्छिम बंगाल च प्रवर्तन निदेशालय नै जाली पासपोर्ट मामले च बिनोदो सरकार ते ओह्दे द'ऊं पुत्तरें गी हिरासतै च लेई लैता ऐ।

<><><><><><>

PM-ESTIC-2025

प्रधानमंत्री नरेंद्र मोदी होरें अज्ज आखेआ ऐ जे भारत हुन प्रौद्योगिकी दा छड़ज्ञ इक उपभोक्ता गै नेई, सगुआं प्रौद्योगिकी दे क्षेत्र च होआ रदे सुधारें ते बदलावें दा इक महत्वपूर्ण अगुवाह बनी चुके दा ऐ। अज्ज नमीं दिल्ली दे भारत मंडपम च उभरदे विज्ञान ते प्रौद्योगिकी नवाचार सम्मेलन इस्टिक-2025 दा उद्घाटन करदे मौके मोदी होरें आखेआ जे सरकार देसै च नमिएं काहडें लेई भलेआं अज्जै-कल्लै दी किस्मै दी तंत्र बवस्था तैयार करने लेई अनुसंधान गी मता सखल्ला ते सैहल बनाने लेई कम्म करा करदी ऐ। उनें आखेआ जे दुनिया दे सभनें शा मते कामयाब डिजिटल सार्वजनिक बुनियादी ढांचे गी मुखै दे अंदर तैयार कीता जारदा ऐ। मोदी होरें आखेआ जे हाल दे किश बरें दरान देसै गी नवाचार दा केंद्र बनाने लेई कीते गेदे फैसले ते बनाई गेदिएं नीतिएं दे नतीजे हुन लब्बन लगी पेदे न। दर्ज पेटेंटें दी गिनतरी च बी 17 गुणा बाद्दा दर्ज कीता गेआ ऐ ते भारत अज्ज दुनिया दा स्टार्ट अप्स ते माफक त्रीया सभनें शा बड्डा केंद्र बनी चुके दा ऐ ते एल्लै मुखै च 6 जहार कोला मते डीप टेक स्टार्ट अप स्वच्छ उर्जा ते उन्नत मटीरियल जनेए क्षेत्रें च कम्म करा करदे न। इस मौके पर प्रधानमंत्री होरें देसै च अनुसंधान ते विकास तंत्र गी बी बढावा देने लेई इक लक्ख करोड़ रपे दी लागत आहली अनुसंधान विकास ते नवाचार योजना दी बी शुरूआत कीती।

<><><><><><>

Bihar-Campaigning

बिहार विधानसभा लेई पैहले गेड़ दे चुनांऽ गितै प्रचार कल्ल संझा खत्म होइ जाग। एन.डी.ए ते महागठबंधन दे बड्डे-बड्डे स्टार प्रचारक रैलिंग ते रोड शोएं दी शकली च मते शा मते मतदाताएं गी अपने हक्क च करने लेई अपनी पूरी टिल्ल ला करदे न। पैहले गेड़ तैहत औंदे वीरवोरं राज्य दे 18एं जिलें च फैली दिएं 121 विधानसभा सीटें लेई वोट पोआए जाडन। जनता दल दे अध्यक्ष ते मुखमंत्री नितिश कुमार होरें अज्ज भागलपुर च इक रैली गी संबोधत करदे होई आखेआ जे उंदी सरकार दरान बिहार बड़ी तेजिया कन्नै तरक्की ते खुशहाली दी बत्तै पर अगड़े बधै करदा ऐ। उनें आखेआ जे प्रधानमंत्री मोदी होरें बिहार गी केई शानदार तोहफे दित्ते न जिंदे च बड्डे पैमाने पर विकास परियोजनां ते कल्याणकारी स्कीमां शामिल न जेहड़ियां बिहार दी कायापलट करै करदियां न। राश्ट्री जनता दल दे नेता तेजस्वी प्रसाद यादव होरें अज्ज भोजपुर चइक रैली गी संबोधित कीता ते आखेआ जे महागठबंधन गै बिहार दे लोकें दिएं दिक्कतें-परेशानिएं गी दूर करी सकदा ऐं उनें आखेआ जे पिछले केइएं बरें थमां सत्ता बने रौहने दे बावजूद बी एनडीए दी सरकार बिहार गी खुशहाल नेई बनाई सकी ऐ पर महागठबंधन दी सरकार जेकर सत्ता च आई तां बिहार दिएं परेशानिएं गी सदा-सदा लेई दूर करी दित्ता जाग।

<><><><><><>

President-Uttarakhand

राश्ट्रपति द्रौपदी मुर्मू होरें अज्ज उत्तराखंड विधानसभा दे विशेष इजलास गी संबोधत कीता। उनें आखेआ कि सरकार दे विकास जत्तें दे नतीजे च उत्तराखंड च मनुक्खी विकास सूचकांक दे केई मानकें च बड़ा मता सुधार दर्ज कीता गेआ ऐ। राज्य च बधदी साक्षरता दर पर संदोख ते खुशी प्रगट करदे होई द्रौपदी मुर्मू होरें आखेआ जे राज्य च महिलाएं दी शिक्षा च बी बाढ़ा दर्ज कीता गेआ ऐ ते यचगी दरान मौरिए दी ते लौहके गिल्लुएं दी मृत्यु दर च बी कमी आई ऐ जेड़ी जे इक संदोखै आहली गल्ल ऐ। उनें आखेआ जे इब्बी इक खुशी आहली गल्ल ऐ जे राज्य सरकार सेहत सेवाएं गी बेहतर बनाने लेई उप्परोतली जत्त करै करदी ऐ।

<><><><><><>

Telangana-Accident

तेलंगाना दे रंगारेड्डी जिले च चेवेल्ला कश मिर्जागुंडा-खानपुर सड़कै पर अज्ज बड्डुलै मूंह न्हरे पेश आए दे इक सड़क हादसे च 19एं जनें दी मौत होई गेई। बड्डुलै कोई 8 क बजे एह हादसा उस्सलै पेश आया जिसलै इक ट्रक नै इक टू व्हीलर गी ओवरटेक करने दी कोशश करदे होइ आर.टी.सी दी इक बस गी टक्कर मारी दित्ती। बकारवाद दे इक सीनियर पुलिस अफसर नै जानकारी दित्ती ऐ जे मारे गेदे 19 यात्रिएं दे शवें गी शनाखत ते पोस्टमार्टम लेई अस्पतालें च भेजी दित्ता गेआ हा जिसलै जे हादसे च घायल होए दे 20 होरनें दा बी इलाज चलै करदा ऐ।

<><><><><><>

Accident-Condolences

राश्ट्रपति द्रौपदी मुर्मू, उपराश्ट्रपति सी.पी राधाकृष्णन ते प्रधानमंत्री नरेंद्र मोदी होरें तेलंगाना दे रंगारेड्डी जिले च पेश आए दे सड़क हादसे पर गैहरा दुख प्रगट कीता ऐ। राश्ट्रपति मुर्मू होरें हादसे गी इक मंदे भागें आहली घटना करार दिंदे होई घायलें दे तौले नरोए होने दी कामना कीती ऐ जिसलै कि उपराश्ट्रपति होरें हादसे पर गैहरा दुख जाहर करदे होई दुखै दी इस घड़ी च सोगी परोआरें कन्नै

अपनी हमदर्दी ते बसोस प्रगट कीता ऐ। तोआई, प्रधानमंत्री मोदी होरें बी इस हादसे च 19 लोकें दे मारे जाने पर गैहरा दुख प्रगट कीता ते घायलें दी तौले ठीक होने लेई प्रार्थना कीती। प्रधानमंत्री होरें मारे गेदे लोकें दे परोआरें गी दो-दो लक्ख रपे दी सींधी सहायता देने दा ऐलान कीता ऐ।

<><><><><><>

Rajasthan-Accident

राजस्थान दी राजधानी जयपुर च हरमाड़ा दे लोहा मंडी इलाके च अज्ज दपैहरी इक तेज रफ्तार डंबर दी ब्रेक फेल होइयै इक दे बाद इक केई कारें ते मोटरसाइकलें कन्नै जाई बज्जने कारण घट्टोघट्ट 13 जनें दी मौत होई गेई ते 30 दुए घायल होई गेन। हादसा इन्ना खतरनाक हा जे केई गड्डियां पूरी चाल्ली चकना-चूर होई गेइयां ते चौने पाससै अफरा-तफरी दा माहौल बनी गेआ। घायलें गी कावंटिया अस्पताल पुजाया गेआ जिसलै जे 5 गंभीर घायलें दा इलाज एस.एम.एस अस्पताल च चलै करदा ऐ।

<><><><><><>

PM-Accident

प्रधानमंत्री नरेंद्र मोदी होरें जयपुर हादसे पर दुख प्रगट करदे होई घायलें दे तौले नरोए होने दी कामना कीती ऐ। उनें मारे गेदे हर व्यक्ति दे परिवार आहलें गी प्रधानमंत्री राहत कोश चा 2-2 लक्ख रपे ते घायलें गी 50-50 ज्हार रपे देने दी घोषणा कीती। तोआई, हुनै कोला किश चिर पैहले थोई दी जानकारी मुजब पुलसै आरोपी डरैवर गी गिरफ्तार करी लैता ऐ ते शुरूआती जांच थमां पता लग्गा ऐ जे ओहदी गड्डी काबू शा बाहर ब्रेक फेल होने दा कारण नेई होई ते एह हादसा डरैवर आसेआ शराब पीए गड्डी चलाने कारण पेश आया।

<><><><><><>

Trump-N-Test

अमरीका दे राष्ट्रपति डोनल्ड ट्रम्प होरें आखेआ ऐ जे पाकिस्तान उनें देशें च शामिल ऐ जेडे बड़ी सक्रियता कन्नै परमाणु परीक्षण करै करदे न। इक प्रेस वार्ता दरान मीडिया आहलें कन्नै गल्ल करदे होई ट्रम्प होरें आखेआ जे रूस, चीन, उत्तर कोरिया ते पाकिस्तान एटमी उर्जा दियां अजमैशां उप्परोतली करदे जा'रदे न। इस करियै अमरीका बी अपने एटमी उर्जा दे परीक्षण परतियै शुरू करोग कीजे जिसलै होर लोक एटमी अजमैशां जारी रक्खे दे न तां अमरीका गी बी अपने परमाणु परीक्षण बंद नेई करने लोड़चदे। उनें दावा कीता जे अमरीका कश दुनिया दे कुसै बी मुल्खै दे मकाबले मते परमाणु थेआर न ते उन्नै रूस ते चीन कन्नै परमाणु निरस्त्रीकरण दे जत्तें बारै बी चर्चा कीती ऐ।

<><><><><><>

W.B Fake Passport

प्रवर्तन निदेशालय ई.डी नै फर्जी पासपोर्ट मामले च अज्ज पच्छिम बंगाल दे नदिया जिले दे चकदाह दे परारी ग्रांउ थमां बिनोदो सरकार ते ओहदे 2 पुत्तरें विपलव सरकार ते विपुल सरकार गी हिरासतै च

लेई लैता ऐ। ई.डी आसेआ जारी जानकारी मुजब इनें आरोपिएं दे रिश्तेदारें बांग्लादेश च ना हाल च गै ई.डी नै फर्जी घेटुगाछी ग्रांऽ पंचैत दे शिबपुर ग्रांऽ दे बसनीक इन्दु भूषण हलधर कोला पुच्छ-गिच्छ दे बाद बिनोदो सरकार ते ओहदे 2 बेटें गी गिरफ्तार करी लैता।

<><><><><><>

EAM-Bahram-Trade

विदेश मंत्री डॉ. एस. जयशंकर होरें आखेआ ऐ जे भारत ते बेहरीन बश्कार दपक्खी बपार ते निवेश च पिछले किश बरें दरान उप्परोतली बेहतरी ते बाद्दा दिक्खने गी लब्बा ऐ। अज्ज नमीं दिल्ली च 5मीं भारत बहरीन उच्च संयुक्त आयुक्त बैठक दे शुरूआती संबोधन च डॉ. जयशंकर होरें आखेआ जे दौनें मुखें बश्कार रक्षा, सुरक्षा, बपार, सेहत, संस्कृति ते लोकें-लोकें बश्कार संपर्क दे क्षेत्र च बड़ा मता बाद्दा ते सुधार दिक्खने गी लब्बा ऐ। उनें बहरीन दे नागरिकें लेई ई-वीजा सुविधा गी उजागर कीता जेदे नै बहरीन दे लोकें गी भारत औने लेई प्रेरित कीता जाई सकग।

<><><><><><>

Fisherman-Arrested

तमिलनाडू ते कराईकल दे 35 मछेरें गी श्रीलंका दी नौसेना नै अज्ज गिरफ्तार करी लैता ऐ। उनेंगी मच्छियां फगडदे होई अंतरराष्ट्री समुंद्री सीमा दी लोआंगना करने दे आरोप च गिरफ्तार कीता गेआ ऐ। गिरफ्तार कीते गेदे इनें मछेरें गी पुच्छ-गिच्छ लेई कांके संथुराई स्थित श्रीलंका नौसेना दे कैक च लेता गेआ जेदे मगरा उनेंगी जाफना च मच्छी पालन मैहकमे दे अधिकारिएं दे हवाले करी दित्ता गेआ ऐ।

<><><><><><>